

Su 17 de Friaxu 1943 – Su Bombardamentu

Is bècius s'arregordant de su 17 friaxu de su 43 che a unu meri de ierru tèbidu e de soli. Gonnos teniat prus pagu de cìncui mila bividoris, e in prus ddoi aiat famìllias medas chi si fiant fuidas de Casteddu.

Fintzas a cussu momentu po Gonnos sa guerra fiat atesu, sceti is citadis mannas comentiu Casteddu, o àteras citadis chi teniant logus militaris de importu mannu, comenti portus o aeroportus militaris, iant connotu sa distrutzioni de is bombardamentus. Nemus podiat pentzai chi una biddixedda aici iat essi stètia atacada, e difatis no ddoi aiat ni sirenas e ni arrefùgius.

Sceti su passàgiu de is aparechius chi andànt e torrànt de s'areoportu de Biddacidru arregordàt a is gonnusus chi s'Itàlia fiat in guerra.

S'atacu de is aparèchius fiat inghitzau a sa una e dexi, candu fiant partius doxi bombardieris de sa basi algerina de Bertaux chi, cumentis si podit cumprèndi de is pianus de bolu, fiant carrius de bombas chi depiant sciorrocai is aparèchius chi s'agatànt in s'aeroportu de Biddacidru.

Is bombardieris fiant arribbaus a Gonnos a is tres mancu quartu e, passau su Monti Linas, noi de custus iant scarriau is bombas asuba de sa bidda e de su sartu acanta.

Is àterus tres, chi fortzis iant cumprèndiu sa faddina, iant sighiu cara de s'aeroportu de Dèximu Mannu.

S'atacu de is bombardieris americanus iat pertocau sa bia Porru Bonelli e sa bia Marconi. De 3650 metrus de artària is aparèchius iant scavuau seixentus-trinta-ses arrogus de bomba chi iant arrogau murus, crabeturas, ecas e gennas, ma pruschetotu, a dolu mannu, ingortu genti meda e bociu prus de centu personas.

Totu sa bia fiat prena de sànguini, de mortus, de arrogus de petza e de genti disisperada chi tzerriàt agitoriu e prangiat.